

CHINESE - JAPANESE LIBRARY  
HARVARD - YENCHING INSTITUTE  
AT HARVARD UNIVERSITY  
OCT 31 1940

5

T3150/0332.83

應州續志卷之八

哈佛大學漢和圖書館珍藏印

應州知州南豐吳炳纂輯

人物志 先賢

文苑

列女

流寓

攷通志三晉人物以道德功業文章顯著者後先相望  
卽雲中一郡自漢迄明賢材輩出雖名垂青史無俟州  
邑乘始傳然而鄉之獻卽民之望司事者紀述寂寥其  
何以闡旣往之幽潛垂方來之模範耶古人云作史貴  
乎識夫衡輕重審去留者識也舊志於先賢登載蓋不  
能無歉云至俎豆宮牆明侯復而下至鮑承先已確鑿

可憑其五代宋暨遼金諸人疑係田志附會然無冊籍  
可稽有舉無廢禮也惟賀拔允非應產不宜濫廁耳次

人物

先賢

後唐

安重誨應州人父福遷事晉爲將以驍勇知名晉兵救  
朱宣福遷戰死重誨少事明宗爲人明敏謹恪明宗  
鎮安國以爲中門使及兵變於魏所與謀議皆重誨  
與霍彥威決之明宗卽位爲左領軍衛大將軍樞密  
使兼領山南東道節度使固辭不拜改兵部尙書使  
如故在位六年累加侍中兼中書令後被讒得罪死  
重誨自爲中門使已見親信而以佐命功臣處機密

之任事無大小皆所參決其盡忠勞力時有補益而旁無正人君子之助其獨見之慮禍釁所生至於臣主俱傷幾滅其族斯其可哀者也。按五代史重誨欲內計國家外制諸侯謂潞王從珂非李氏子後必爲國家患欲陰圖之未果臨死嘆曰恨不與國家除去潞王後從珂果反弑愍帝自立

宋

郭崇應州金城人重厚寡言有方畧後唐清泰中爲應州騎軍都校晉祖割雲應入契丹奮身南歸歷鄆河

中潞三鎮騎軍都校開運中戍太原會漢祖起以崇爲先鋒入汴改護聖左第六軍都校領郢州刺史改領富州從周祖平河中以功遷果州防禦使領護聖右廂都指揮使周祖鎮鄴以崇領行營騎軍兼天雄軍都巡檢使乾祐三年冬從周祖走慕容彥超於劉子陂補侍衛馬軍都指揮使廣順初領定武軍節度又爲京城都巡檢使修城都部署兼知步軍公事未幾命爲陳州節度加同平章事出鎮澶州促還鎮所世宗初并人侵潞命與符彥卿出固鎮以禦之世宗

親征又副彥卿為行營都部署加兼侍中冬移正定  
尹成德軍節度四年契丹騎萬餘掠邊崇率眾攻下  
束鹿縣斬數百級俘獲甚眾五年來朝賜襲衣金帶  
器幣鞍勒馬恭帝加檢校太師宋初加兼中書令崇  
追感周室恩遇時復泣下監軍陳思誨密奏之太祖  
曰我素知崇篤於恩義蓋有所激發耳遣人覘之還  
言崇方對賓屬坐池潭小亭飲博城中宴然太祖笑  
曰果如朕言未幾來朝改命為平盧節度乾德三年  
卒年五十八贈太師子守璘洛苑副使妻即明德后

姊也子允恭以父任授殿直至崇儀副使知常州卒  
次女為仁宗后天聖三年詔贈尚書令兼中書令守  
璘太尉寧國軍節度兼中書令允恭忠武軍節度兼  
侍中允恭子中庸左侍禁閤門祇候副使中和娶穎

川郡王德彝女為西染院副使

舊志載後周悞

周廣字大均應州神武川人父密晉鄜延晉三鎮節度  
使周廣順初至太子太師致仕廣幼從父為牙校漢  
初授供奉官尋擢左千牛衛將軍周祖討慕容彥超  
為行營都監錄功遷右武衛俄改右神武充鎮淮軍

兵馬都監從征淮南令安集江北數州民甚德之因  
領常州刺史兼內外馬步軍都軍頭淮南平改領眉  
州未初授隰州刺史乾德三年遷潘州團練使令訓  
練雄武諸營開寶二年從征太原爲攻城樓櫓戰櫂  
都部署師還加內外馬步軍副都軍頭六年改右屯  
衛大將軍領郡如故太平興國二年卒

李重誨應州金城人祖高後唐莊宅使樊州刺史父彥  
榮仕遼署環州刺史重誨嘗爲應州馬步軍都指揮  
使太平興國五年從節度使蕭咄李逆潘美戰於代

州北嶺大敗美擒重誨以獻補鄧州馬步軍都指揮  
使會趙普出鎮奏監州軍雍熙三年爲武州刺史忻  
州都巡檢緣邊十八砦招安制置使賜服帶鞍馬遼  
兵入以所部邀戰敗之獲羊馬鎧甲甚衆賜詔嘉美  
改廣桂融宜柳州招安捉賊使聽便宜從事至道初  
累遷涇原儀渭鎮戎軍鈐轄咸平三年徙邠寧環慶  
路坐轉餉靈武至積石爲所掠流光州五年起內殿  
崇班廊延駐泊都監俄遷崇儀使景德中上以涇源  
地要兵衆徙爲鈐轄復遷益州改皇城使大中祥符

六年卒年六十八重誨純慤寡過上悼之命其子乘傳往護柩歸聽止驛舍次子禹謨將作監主簿弟重睿歷澄州團練使子禹偁閤門祗候俱見宋史周廣李重誨蕭志未載

遼

邢抱朴應州人刑部郎中簡之子也抱朴性穎悟好學博古保寧初爲政事舍人知制誥累遷翰林學士加禮部侍郎統和四年山西州縣被兵命抱朴鎮撫之民始安加戶部尙書遷翰林學士承旨與室昉同修

實錄決南京滯獄還優詔褒美十年拜叅知政事以樞密韓德讓薦按察諸道守令能否而黜陟之大協人望尋以母憂去官詔起視事表乞終制不從宰相密諭上意乃視事人以孝稱及耶律休哥留守南京又多滯獄復詔抱朴平決之人無冤者改南院樞密使卒贈侍中初抱朴與弟抱質受經於母陳氏皆以儒術顯抱質統和二十九年五月知南院樞密使事十二月以年老詔乘小車入朝開泰元年三月詔卜日行大射柳之禮命偕北宰相駙馬蘭陵郡王蕭寧

督有司具儀物四月出為大同軍節度使二年正月  
加開府儀同三司守司空兼侍中卒

遼史

金

康公弼字伯迪應州人曾祖肩遠保寧閒以戰功授誓  
券家於燕之宛平公弼好學年二十三中進士除著  
作郎武州軍事判官辟樞府令史求外補出為寧遠  
令縣中隕霜殺禾稼漕司督賦急繫之獄公弼上書  
朝廷釋之因免縣中租稅縣人為立生祠監平州錢  
帛庫調役糧於川州大盜侯槩陷川州使護送公弼

出境日良吏也權乾州節度使卒謚忠肅天會七年

贈侍中正隆三年改贈特進道國公

按公弼卒於金  
依通志列金代

高汝勵字巖夫應州金城人登大定十九年進士第蒞

官有能聲累除同知絳陽軍節度事明昌五年陞石

州刺史承安元年入為左司郎中擢左諫議大夫尋

同知大興府事歷陝西東路轉運使泰和元年改西

京路轉運使二年轉北京臨潢府按察使四年又轉

河北西路轉運使十一月進中都路都轉運使六年

六月拜戶部尚書貞祐二年宣宗南遷次邯鄲拜叅



知政事尋遷尚書右丞四年三月拜平章政事俄進  
 尚書右丞相監修國史封壽國公屢乞致仕不允十  
 月遷榮祿大夫哀宗初告老優詔不許正大元年三  
 月卒年七十一配享宣宗廟廷汝勵慎密廉潔能  
 主知在相位十餘年規守格法循默避事未嘗有  
 訶士論頗以貪戀不去譏之俱見金史○舊志封榮國公  
 誤

元

李伯述應州人至正間為河南省左丞卒於兵追封

國公諡忠愍通志

明

侯復應州人洪武丙子舉人授國子監監丞遷翰林院  
 編修仍兼監丞尋晉國子監司業前後三蒞國學  
 正身率物人士翕然宗之○田志入祀鄉賢

寇謙應州人永樂甲午舉人授戶科給事中時相頗專  
 擅方得上寵謙抗章糾之風生朝宁○田志入祀鄉  
 賢

郭頤應州人永樂中貢生由知縣擢監察御史出按京

續文皇帝北征抗疏力爭後復屢疏言事朝若有咸側  
日遂拂衣歸。田志入祀鄉賢。

石瑁字信之應州人數歲知孝友父兄嘗奇之。宣德  
己酉鄉試癸丑成進士觀政戶部收通州倉糴糧宿弊  
悉釐革正統初授禮科給事中擢金華府知府鄰郡盜  
起出兵擊之民避盜者千百為羣之倉瑁開倉以濟  
衆為歌謠頌之以祖母喪去任都御史軒輊言於朝  
起原官尋升福建右布政使上聞其賢以為南京禮  
部左侍郎未幾召為禮部尚書時共於位朝望益孚

甫一載而卒年六十有四。按李賢神道碑瑁以祖母喪去任通志謂丁母憂去

悞。田志入祀鄉賢。

田天澤應州人宏治壬子舉人授定興令時流賊圍定

興攻城幾陷天澤督兵拒走之陞上林苑左監丞尋

陞耀州知州有巨璫挾寵恣睢陝西諸郡多被科索

跡且至耀天澤曰他州自有耀州自無堅拒之民不

為擾丁外艱服闋起補疾作蕭寺中竟不起贈通議

大夫。按孫丕揚傳天澤服闋起補卒悞於京通志謂致政歸卒悞。田志入祀鄉賢。

田蕙應州人萬歷甲戌進士任蒲城縣知縣陞戶部主

事歷通政司左右叅議升通政使性剛直不阿爲忌者所中歸里杜門謝客躬耕訓讀士論多之。按孫繼臯墓誌謂歷通政使通志謂歷左右叅議歸誤上俱見通志

國朝

鮑承先應州人世襲安東衛指揮明萬歷時任開原副一總兵加都督僉事遼陽陷沒糾集殘兵守大小黑山援三岔河兵潰被傷棄職入遼陽之首山

太祖高皇帝聞之遣使召見賜資優渥

太宗文皇帝知其賢授祕書院大學士予阿達哈哈番世襲罔替改吏部承政以病乞休

世祖章皇帝入定中原召見殿上問以治道備陳新政請祖堯舜以行仁法湯武以除暴賜蟒幣鞍馬以江南三楚滇黔閩粵遺氛未靖命往經畧未赴以疾卒

世祖皇帝聞之痛悼遣大學士范文程等視含殮又遣官賜祭居鄉多義舉士民景慕其德大同府學及大同應州兩學俱崇祀鄉賢

家譜

炳按蕭志先賢原傳俱刪去不載甚不可解夫史家

之體有一人而父子兄弟祇須附見難以分載者或  
提敘傳首或補書傳尾雖一人而家之世次盛衰累  
備如郭崇李重誨周廣邢抱朴之類皆是也今刪去  
原傳既於本人家世未詳亦於志傳體例不合通志  
載全省人物尙備錄原傳何獨州志而疎謬如此舊  
志載北齊賀拔允爲應人攷北史允神武尖山人魏  
書神武屬朔州領縣二尖山殊顏尖山卽今寧武縣  
見通志是允非應人明矣况允祖尙頭父度拔弟勝  
岳二人俱見北史有名當時又不宜錄允一人而遺  
其他通志載允祖父兄弟俱入寧武則州志人物之  
首當削去允名萬無疑義者也

文苑

元

曹之謙字益甫應州人興定閒進士文名著於金元閒  
寓居平陽三十載與諸生講學一以伊洛爲宗遠近  
多從之游所著有兌齋文集行於世汲郡王惲序之  
曰先生之作其析理知言擇之精語之詳渾涵經旨  
深尙體之工刊落陳言極自得之趣而又抑揚有法  
豐約得所可謂常而知變醇而不雜者也。按元詩  
小序稱其幼知力學早擢巍科旣而與元好問同掾

東曹機務倥傯商訂文字未嘗稍輟則是哀宗天興  
初曾官尚書省左司掾也其送李端卿詩云曾爲同  
省掾偏愴遠離情可証舊志謂隱居不仕殆入元以  
後事耶

國朝

左光圖字翼宸應州人篤學介行舉天啓辛酉鄉試授  
河南嵩縣知縣光圖性至孝母早卒繼母薄常虐使  
之光圖色愈恭雖呵責敬承不違薄寢愛如己出嵩  
之破也光圖爲賊所得將殺之薄泣曰我繼母也兒

事我孝願以身代兒死先是光圖蒞嵩賊遣使持偽  
檄脅降光圖碎檄杖其使曰若當斬姑活若以語賊  
嵩邑官民誓且滅賊朝食矣比賊至登埤固守閱數  
月旁邑胥陷城遂破光圖投水中不死因奉薄入嵩  
山薄尋卒閒道奉柩歸葬蕭然自守屢日不火食泊  
如也工詩善書不輕贈答親知餽遺之胥不受州守  
慕其品求一晤不可得著有知非集學步吟諸書○  
按史家列傳之體其人雖仕於前朝而卒於易世者  
俱載之後代觀宋元明諸史可知故列曹於元列左

於 本朝舊志悞

炳按郡志曹之謙通志左光圖俱載文苑今攷其實  
仍之曹之兌齋集左之知非諸集遍搜州境歷久竟  
不可得曹集幸有顧俠君元百家詩選尙留什一而  
左集因後裔衰弱邈無復存夫通都大邑士之著書  
立說傳播後世者賴有鄉獻之儲錄子孫之家乘耳  
應地僻陋文獻無徵前賢雖有一二殘編缺簡後  
既不能守而宗族閭黨又視爲無足重輕不深愛惜  
身死未幾楮墨卽漸滅無傳然則士之生於其鄉固

一有幸不幸哉

列女

遼

邢簡妻陳氏營州人父陘五代時累官司徒陳氏甫笄

涉通經義汎覽詩賦皆能誦尤好吟咏時以女秀才

名之年二十歸於簡孝舅姑閨門和睦親黨推重有

六子陳氏親教以經後二子抱朴抱質皆以賢位宰

相統和十二年卒睿智皇后聞之嗟悼贈魯國夫人

刻石以表其行及遷祔遣使以祭論者謂貞靜柔順

婦道母儀始終無缺云

見遼史列女傳舊志失載



明

劉氏州人賈雲衢妻夫歿氏年二十五歲苦志撫孤壽

五十五卒萬歷丙午旌表

見郡志舊志失載

國朝按雍正四年以前已載舊志者不錄

鄭氏廩生曹森妻夫歿氏年二十六歲無子守節四十

年壽六十六卒州牧竇容遂表其門

孟氏里民談繼先妻夫歿氏年十九歲無子以夫兄子

為嗣守節三十四年壽五十二卒州牧吳超表其門

王氏里民王生芝妻夫歿氏年二十八歲撫孤成立守

節三十八年壽六十五學使蔣公表其門

邱氏里民白佐妻夫歿氏年二十二歲拮据撫孤現年

六十八守節已四十六年

孫氏武生趙宓妻夫歿氏年二十四歲無子以夫兄子

為嗣撫之成立現年五十九守節已三十五年

張氏里民劉好古妻夫歿氏年十九歲偕孀姑陳氏撫

孤陳氏現年七十張氏現年五十計張氏守節已三

十一年

霍氏里民韓世榮妻夫歿氏年二十四歲無子奉繼姑

鳳州續志 卷八  
能盡其歡現年六十二守節已三十八年

劉氏生員朱秉曦妻夫歿氏年三十歲撫孤成立守節  
已二十七年

張氏生員王爾傅妻夫歿氏年三十歲撫孤成立守節  
已二十六年

張氏里民張祚宏妻夫歿氏年二十八歲三子俱幼撫  
之成立現年七十七守節已五十年州牧繆集吳炳  
俱表其門

張氏里民王宣璋妻夫歿氏年二十歲無子家貧舅姑  
歿後就養母家以卒年五十八計守節已三十五年  
何氏里民安恭妻夫歿氏年二十歲子生方六月撫養  
成立現年四十八計守節已二十九年

張氏里民王傑妻夫歿氏年二十三歲撫孤成立現年  
六十五計守節已四十二年州牧吳炳表其門  
常氏里民董大公妻夫歿氏年二十七歲三子俱幼撫  
之成立現年七十計守節已四十三年

魏氏里民劉行信妻夫歿氏年二十歲二子俱幼撫之  
成立現年五十八計守節已三十九年

炳按易恆之六五觀之六一家人之彖皆以言女子之德蓋家之正必自女始所謂家人利女貞也應雖僻壤然閨闈之內是非羞惡之心無殊於通都巨邑其矢志柏舟垂名綽楔必有其人乃雍正四年後請旌之典無聞豈子孫限於時地抑司牧艱於彰闡歟夫之死靡他茹荼如飴富貴貧賤舉無足搖動其心豈復希冀後世之名而爲之子若孫者竟任聽湮沒無傳何以慰幽魂而彰彝教予視篆以後屢經愷切勸諭絕無應者爰採訪數人勒諸志乘藉以稍抒義

烈之光默補化源之缺將先聲所樹壺行益貞者闡揚益盛卽爲代北風俗轉移之助非僅金城小補云

爾

流寓

明

沈良 浙江仁和人官刑部主事洪武三十一年謫

成應州善春秋經術湛深士多受業門下若尚書石

瑁輩皆其門人

盛春 浙江海鹽人官監察御史洪武三十二年謫

成應州博學能文慷慨不羈世業儒其孫桓為大同

府學生

彭大有 河南陳州人官戶部郎中奉命督餉駐劄應

州明易學公餘講論不輟應士從遊者甚多舉人霍慶芳輩皆出其門

以上見田志

國朝

林贊王 字臯思莆田人知州友王之弟工詩善書畫

僑居應州二十年稔知學田所入無幾不足供修補

學宮之用捐所置大北頭村田地盡送歸學至今賴

之 見學田碑記

炳按東南名勝之地多有文人墨士寄跡其間其騷

賦咏歌足以發山水之奇麗增都邑之光華所謂如

蘭在谷無地不芳者非耶若荒陬僻壤所至者非羣

旅無聊之人卽放廢窮愁之士已旣厭薄其地而人

亦不敬愛之其名與身同盡者比比也田志所載三

人或以謫籍久居或以囚公暫寄然經術流溢教授

生徒彬彬稱盛地雖鄙陋亦曷不可以自見哉蕭志

缺而不書誤矣莆田林氏捐置學田亦好義之流也

附錄之

應州續志卷之八終



